

四庫全書

史部

欽定四庫全書

史部

明文卷一百四十一至

御史_臣李陽_斌覆勘

總校官編修_臣朱_鈐

欽定四庫全書

明史卷一百四十一

大學士張廷玉等奉 敕修

列傳第二十九

齊泰

黃子澄

方孝孺

虛原質

鄭公智

林嘉猷

胡子昭

練子寧

宋葉希賢

茅大方

周璿

卓敬

郭任

陳迪

黃魁

景清連

楹

胡閏高

翔

王

度

戴德桑
董鏞

謝昇
陳繼之

丁志方
韓永

甘霖
葉福

齊泰溧水人初名德洪武十七年舉應天鄉試第一明年成進士歷禮兵二部主事雷震謹身殿太祖禱郊廟擇歷官九年無過者陪祀德與焉賜名泰二十八年以兵部郎中擢左侍郎太祖嘗問邊將姓名泰歷數無遺又問諸圖籍出袖中手冊以進簡要詳密大奇之皇太孫素重泰及即位命與黃子澄同叅國政尋進尚書時

遺詔諸王臨國中毋奔喪王國吏民聽朝廷節制諸王
謂泰矯皇考詔間骨肉皆不悅先是帝為太孫時諸王
多尊屬擁重兵患之至是因密議削藩建文元年周代
湘齊岷五王相繼以罪廢七月燕王舉兵反師名靖難
指泰子澄為奸臣事聞泰請削燕屬籍聲罪致討或難
之泰曰明其為賊敵乃可克遂定議伐燕布告天下時
太祖功臣存者甚少乃拜長興侯耿炳文為大將軍帥
師分道北伐至真定為燕所敗子澄薦曹國公李景隆

代將泰極言不可子澄不聽卒命景隆將當是時帝舉
五十萬兵畀景隆謂燕可旦夕滅燕王顧大喜曰昔漢
高止能將十萬景隆何才其衆適足為吾資也是冬景
隆果敗帝有懼色會燕王上書極詆泰子澄帝乃解二
人任以謝燕而陰留之京師仍叅密議景隆遺燕王書
言二人已竄可息兵燕王不聽明年盛庸捷東昌帝告
廟命二人任職如故及夾河之敗復解二人官求罷兵
燕王曰此緩我也進益急始削藩議起帝入泰子澄言

謂以天下制一隅甚易及屢敗意中悔是以進退失據
迨燕兵日逼復召泰還未至京師已不守泰走外郡謀
興復時購泰急泰墨白馬走行稍遠汗出墨脫或曰此
齊尚書馬也遂被執赴京同子澄方孝孺不屈死泰從
兄弟敬宗等皆坐死叔時永陽彥等謫戍子甫六歲免
死給配仁宗時赦還

黃子澄名湜以字行分宜人洪武十八年會試第一由
編修進修撰伴讀東宮累遷太常寺卿惠帝為皇太孫

時嘗坐東角門謂子澄曰諸王尊屬擁重兵多不法奈何對曰諸王護衛兵纔足自守倘有變臨以六師其誰能支漢七國非不強卒底亡滅大小強弱勢不同而順逆之理異也太孫是其言比即位命子澄兼翰林學士與齊泰同叅國政謂曰先生憶昔東角門之言乎子澄頓首曰不敢忘退而與泰謀泰欲先圖燕子澄曰不然周齊湘代岷諸王在先帝時尚多不法削之有名今欲問罪宜先周周王燕之母弟削周是剪燕手足也謀定

明日入白帝會有言周王櫛不法者遂命李景隆帥兵襲執之詞連湘代諸府於是廢櫛及岷王梗為庶人幽代王桂於大同囚齊王榑於京師湘王柏自焚死下燕議周王罪燕王上書申救帝覽書惻然謂事宜且止子澄與泰爭之未決出相語曰今事勢如此安可不斷明日又入言曰今所慮者獨燕王耳宜因其稱病襲之帝猶豫曰朕即位未久連黜諸王若又削燕何以自解於天下子澄對曰先人者制人毋為人制帝曰燕王智勇

善用兵雖病恐猝難圖乃止於是命都督宋忠調緣邊
官軍屯開平選燕府護衛精壯隸忠麾下召護衛胡騎
指揮古通等入京以弱燕復調北平永清左右衛官軍
分駐彰德順德都督徐凱練兵臨清耿璈練兵山海關
以控制北平皆泰子澄謀也時燕王憂懼以三子皆在
京師稱病篤乞三子歸泰欲遂收之子澄曰不若遣歸
示彼不疑乃可襲而取也竟遣還未幾燕師起王泣誓
將吏曰陷害諸王非由天子意乃奸臣齊泰黃子澄所

為也始帝信任子澄與秦驟事削藩兩人本書生兵事
非其所長當耿炳文之敗也子澄謂勝敗常事不足慮
因薦曹國公李景隆可大任帝遂以景隆代炳文而景
隆益無能為連敗於鄭村壩白溝河喪失軍輜士馬數
十萬已又敗於濟南城下帝急召景隆還赦不誅子澄
慟哭請正其罪帝不聽子澄拊膺曰大事去矣薦景隆
誤國萬死不足贖罪及燕兵漸南與齊泰同謫外密令
募兵子澄微服由太湖至蘇州與知府姚善倡義勤王

善上言子澄才足捍難不宜棄閒達以快敵人帝復召
子澄未至而京城陷欲與善航海乞兵善不可乃就嘉
興楊任謀舉事為人告俱被執子澄至成祖親詰之抗
辨不屈磔死族人無少長皆斬姻黨悉戍邊一子變姓
名為田經遇赦家湖廣咸寧正德中進士黃表其後云
楊任洪武中由人材起家歷官袁州知府時致仕匿子
澄於家亦磔死二子禮益俱斬親屬戍邊

方孝孺字希直一字希古寧海人父克勤洪武中循吏

自有傳孝孺幼警敏雙眸炯炯讀書日盈寸鄉人目為
小韓子長從宋濂學濂門下知名士皆出其下先輩胡
翰蘇伯衡亦自謂弗如孝孺顧末視文藝恒以明王道
致太平為己任嘗臥病絕糧家人以告笑曰古人三旬
九食貧豈獨我哉父克勤坐空印事誅扶喪歸葬哀動
行路既免喪復從濂卒業洪武十五年以吳沉揭樞薦
召見太祖喜其舉止端整謂皇太子曰此莊士當老其
才禮遣還後為仇家所連逮至京太祖見其名釋之二

十五年又以薦召至太祖曰今非用孝孺時除漢中教授日與諸生講學不倦蜀獻王聞其賢聘為世子師每見陳說道德王尊以殊禮名其讀書之廬曰正學及惠帝即位召為翰林侍講明年遷侍講學士國家大政事輒咨之帝好讀書每有疑即召使講解臨朝奏事臣僚面議可否或命孝孺就扈前批答時修太祖實錄及類要諸書孝孺皆為總裁更定官制孝孺改文學博士燕兵起廷議討之詔檄皆出其手建文三年燕兵掠大名

王聞齊黃已竄上書請罷盛庸吳傑平安兵孝孺建議
曰燕兵久頓大名天暑雨當不戰自疲急令遼東諸將
入山海關攻永平真定諸將渡盧溝搗北平彼必歸救
我以大兵躡其後可成擒也今其奏事適至宜且與報
書往返踰月使其將士心懈我謀定勢合進而蹴之不
難矣帝以為然命孝孺草詔遣大理寺少卿薛嵩馳報
燕盡赦燕罪使罷兵歸藩又為宣諭數千言授嵩持至
燕軍中密散諸將士比至嵩匿宣諭不敢出燕王亦不

奉詔五月吳傑平安威庸發兵擾燕餉道燕王復遣指揮武勝上書伸前請帝將許之孝孺曰兵罷不可復聚願毋為所惑帝乃誅勝以絕燕未幾燕兵掠沛縣燒糧艘時河北師老無功而德州又饋餉道絕孝孺深以為憂以燕世子仁厚其弟高煦狡譎有寵於燕王嘗欲奪嫡謀以計間之使內亂乃建議白帝遣錦衣衛千戶張安齋璽書徃北平賜世子世子得書不啟封并安送燕軍前間不得行明年五月燕兵至江北帝下詔徵四方

兵孝孺曰事急矣遣人許以割地稽延數日東南募兵
漸集北軍不長舟楫決戰江上勝負未可知也帝遣慶
成郡主往燕軍陳其說燕王不聽帝命諸將集舟師江
上而陳瑄以戰艦降燕燕兵遂渡江時六月乙卯也帝
憂懼或勸帝他幸圖興復孝孺力請守京城以待援兵
即事不濟當死社稷乙丑金川門啟燕兵入帝自焚是
日孝孺被執下獄先是成祖發北平姚廣孝以孝孺為
託曰城下之日彼必不降幸勿殺之殺孝孺天下讀書

種子絕笑成祖額之至是欲使草詔召至悲慟聲徹殿
陛成祖降榻勞曰先生毋自苦予欲法周公輔成王耳
孝孺曰成王安在成祖曰彼自焚死孝孺曰何不立成
王之子成祖曰國賴長君孝孺曰何不立成王之弟成
祖曰此朕家事顧左右授筆札曰詔天下非先生草不
可孝孺投筆於地且哭且罵曰死即死耳詔不可草成
祖怒命磔諸市孝孺慨然就死作絕命詞曰天降亂離
兮孰知其由奸臣得計兮謀國用猶忠臣發憤兮血淚

交流以此殉君兮抑又何求嗚呼哀哉兮庶不我尤時
年四十有六其門人德慶侯廖永忠之孫鏞與其弟銘
檢遺骸瘞聚寶門外山上孝孺有兄孝聞力學篤行先
孝孺死弟孝友與孝孺同就戮亦賦詩一章而死妻鄭
及二子中憲中愈先自經死二女投秦淮河死孝孺工
文章醇深雄邁每一篇出海內爭相傳誦永樂中藏孝
孺文者罪至死門人王徐潛錄為侯城集故後得行於
世仁宗即位諭禮部建文諸臣已蒙顯戮家屬籍在官

者悉宥為民還其田土其外親戍邊者留一人戍所餘
放還萬厯十三年三月釋生孝孺謫戍者後裔浙江江
西福建四川廣東凡千三百餘人而孝孺絕無後惟克
勤弟克家有子曰孝復洪武二十五年嘗上書闕下請
減信國公湯和所加寧海賦謫戍慶遠衛以軍籍獲免
孝復子琬後亦得釋為民世宗時松江人俞斌自稱孝
孺後一時士大夫信之為纂歸宗錄既而方氏察其偽
言於官乃已神宗初有詔褒錄建文忠臣建表忠祠於

南京首徐輝祖次孝孺云孝孺之死宗族親友前後坐誅者數百人其門下士有以身殉者盧原質鄭公智林嘉猷皆寧海人原質字希魯孝孺姑子也由進士授編修歷官太常少卿建文時屢有建白燕兵至不屈與弟原朴等皆被殺公智字叔貞嘉猷名昇以字行皆師事孝孺孝孺嘗曰匡我者二子也公智以賢良舉為御史有聲嘉猷洪武丙子以儒士校文四川建文初入史館為編修尋遷陝西僉事嘗以事入燕邸知高煦謀傾世

子狀孝孺間燕之謀實嘉猷發之胡子昭字仲常初名
志高榮縣人孝孺為漢中教授時往從學蜀獻王薦為
縣訓導建文初與修太祖實錄授檢討累遷至刑部侍
郎鄭居貞閩人與孝孺友善以明經歷官鞏昌通判河
南叅政所至有善績孝孺教授漢中居貞作鳳雛行勗
之諸人皆坐黨誅死孝孺主應天鄉試所得士有長洲
劉政桐城方法政字仲理燕兵起草平燕策將上之以
病為家人所沮及聞孝孺死後嘔血卒法字伯通官四

川都司斷事諸司表賀成祖登極當署名不肯投筆出
被逮次望江瞻拜鄉里曰得望我先人廬舍足矣自沉
於江成祖既殺孝孺以草詔屬侍讀樓璉璉金華人嘗
從宋濂學承命不敢辭歸語妻子曰我固甘死正恐累
汝輩耳其夕遂自經或曰草詔乃括蒼王景或曰無錫

王達云

練子寧名安以字行新淦人父伯尚工詩洪武初官起
居注以直言謫外任終鎮安通判子寧英邁不群十八

年以貢士廷試對策力言天之生材有限陛下忍以區區小故縱無窮之誅何以為治太祖善其意擢一甲第二授翰林修撰丁母艱力行古禮服闋復官歷遷工部侍郎建文初與方孝孺並見信用改吏部左侍郎以賢否進退為己任多所建白未幾拜御史大夫燕師起李景隆北征屢敗召還子寧從朝中執數其罪請誅之不聽憤激叩首大呼曰壞陛下事者此賊也臣備員執法不能為朝廷除賣國奸死有餘罪即陛下赦景隆必無

赦臣因大哭求死帝為罷朝宗人府經歷宋徽御史葉希賢皆抗疏言景隆失律喪師懷二心宜誅並不納燕師既渡淮靖江府長史蕭用道衡府紀善周是修上書論大計指斥用事者書下廷臣議用事者盛氣以詬二人子寧曰國事至此尚不能容言者耶詬者愧而止燕王即位縛子寧至語不遜磔死族其家姻戚俱戍邊子寧從子大亨官嘉定知縣聞變同妻沉劉家河死里人徐子權以進士為刑部主事聞子寧死慟哭賦詩自經

子寧善文章孝孺稱其多學而文弘治中王佐刻其遺文曰金川玉屑集提學副使李夢陽立金川書院祀子寧名其堂曰浩然徵不知何許人嘗疏請削罪藩屬籍燕師入不屈并妻子俱死希賢松陽人亦坐奸黨被殺或曰去為僧號雪菴和尚云

茅大芳名誦以字行泰興人博學能詩文洪武中為淮南學官召對稱旨擢秦府長史制詞以董仲舒為言大芳益奮激盡心輔導額其堂曰希董方孝孺為之記建

文元年遷副都御史燕師起遺詩淮南守將梅殷辭意
激烈聞者壯之周璿洪武末以天策衛知事建言擢左
僉都御史燕王稱帝與大芳並見叔不屈死而大芳子
順童道壽俱論誅二孫死獄中

卓敬字惟恭瑞安人穎悟過人讀書十行俱下舉洪武
二十一年進士除戶科給事中鯁直無所避時制度未
備諸王服乘擬天子敬乘間言京師天下視效陛下於
諸王不早辨等威而使服飾與太子埒嫡庶相亂尊卑

無序何以令天下帝曰爾言是朕慮未及此益罷重之
他日與同官見適八十一人命改官為元士尋以六科
為政事本源又改曰源士已復稱給事中歷官戶部侍
郎建文初敬密疏言燕王智慮絕倫雄才大略酷類高
帝北平形勝地士馬精強金元所由興今宜徙封南昌
萬一有變亦易控制夫將萌而未動者幾也量時而可
為者勢也勢非至剛莫能斷幾非至明莫能察奏入翌
日召問敬叩首曰臣所言天下至計願陛下察之事竟

寢燕王即位被執責以建議徙燕離間骨肉敬厲聲曰
惜先帝不用敬言耳帝怒猶憐其才命繫獄使人諷以
管仲魏徵事敬泣曰人臣委贄有死無二先皇帝曾無
過舉一旦橫行篡奪恨不即死見故君地下乃更欲臣
我耶帝猶不忍殺姚廣孝故與敬有隙進曰敬言誠見
用上寧有今日乃斬之誅其三族敬立朝慷慨美丰姿
善談論凡天官輿地律歷兵刑諸家無不博究成祖嘗
歎曰國家養士三十年惟得一卓敬萬厯初用御史屠

叔方言表墓建祠同時戶部侍郎死者有郭任盧迴任
丹徒人一日定遠人廉慎有能建文初佐戶部飲食起
居俱在公署時方貶削諸藩任言天下事先本後末則
易成今日儲財粟備軍實果何為者乃北討周南討湘
舍其本而末是圖非策也且兵貴神速苟曠日持久銳
氣既竭姑息隨之將坐自困耳燕王間而惡之兵起任
與同官盧迴主調兵食京師失守被禽不屈死之子經
亦論死少子戍廣西迴仙居人與朗不拘細行喜飲酒

飲後輒高歌人謂迴狂及仕折節恭慎建文三年拜戶部侍郎燕兵入不屈縛就刑長謳而死台人祀之八忠祠

陳迪字景道宣城人祖宥賢明初從征有功世撫州守禦百戶因家焉迪倜儻有志操辟府學訓導為郡草賀萬壽表太祖異之入之以通經薦歷官侍講出為山東左叅政多惠政丁內艱起復除雲南右布政使普定曲靖烏撒烏蒙諸蠻煽亂迪率土兵擊破之賜金幣建文

初徵為禮部尚書時更修制度沿革損益迪議為多會以水旱詔百官集議迪請清刑獄招流民凡二十餘事皆從之尋加太子少保李景隆等數戰敗迪陳大計命督運軍儲已聞變趨赴京師燕王即帝位召迪責問抗聲不屈命與子鳳山丹山等六人磔於市既死人於衣帶中得詩及五噫歌辭意悲烈蒼頭侯來保拾其遺骸歸葬妻管縊死幼子珠生五月乳母潛置溝中得免八歲為怨家所訐成祖宥其死戍撫寧尋徙登州為蓬萊

人洪熙初赦還鄉給田產成化中寧國知府涂觀建祠
祀迪弘治間裔孫昂舉進士仕至應天府尹剛鯁有聲
黃魁不知何許人為禮部侍郎有學行習典禮迪及侍
郎黃觀皆愛敬之燕兵入不屈死有巨敬者平涼人為
御史改戶部主事充史官以清慎稱與迪同不屈死夷
其族

景清本耿姓訛景真寧人倜儻尚大節讀書一過不忘
洪武中進士授編修改御史三十年春召見命署左僉

都御史以奏疏字誤懷印更改為給事中所劾下詔獄
尋宥之詔巡察川陝私茶除金華知府建文初為北平
叅議燕王與語言論明晰大稱賞再遷御史大夫燕師
入諸臣死者甚衆清素預密謀且約孝孺等同殉國至
是獨詣闕自歸成祖命仍其官委蛇班行者久之一日
早朝清衣緋懷刃入先是日者奏異星赤色犯帝座甚
急成祖故疑清及朝清獨著緋命搜之得所藏刃詰責
清奮起曰欲為故主報讎耳成祖怒磔死族之籍其鄉

轉相攀染謂之瓜蔓抄村里為墟初金川門之啟御史連楹叩馬欲刺成祖被殺屍植立不仆楹裏垣人

胡閨字松友鄱陽人太祖征陳友諒過長沙王吳芮祠見題壁詩奇之立召見帳前洪武四年郡舉秀才入見帝曰此書生故題詩鄱陽廟壁者邪授都督府都事遷經歷建文初選右補闕尋進大理寺少卿燕師起與齊黃華晝夜畫軍事京師陷召閨不屈與子傳道俱死幼子傳慶戌邊四歲女郡奴入功臣家稍長識大義日以

卷一百一十一
繫灰汚面洪熙初赦還鄉貧甚誓不嫁見者競遺以錢
穀曰此忠臣女也高翔朝邑人洪武中以明經為監察
御史建文時戮力兵事成祖聞其名與閏同召欲用之
翔喪服入見語不遜族之發其先冢親黨悉戍邊諸給
高氏產者皆加稅曰令世世罵翔也

王度字子中歸善人少力學工文辭用明經薦為山東
道監察御史建文時燕兵起度悉心贊事及王師屢敗
度奏請募兵小河之捷奉命勞軍徐州還方孝孺與度

書誓死社稷燕王稱帝坐方黨謫戍賀縣又坐語不遜
族度有智計盛庸之代景隆度密陳便宜是以有東昌
之捷景隆徵還赦不誅反用事忌庸等功讒間之度亦
見疎論者以其用有未盡惜之戴德彝奉化人洪武二
十七年進士累官侍講太祖諭之曰翰林雖職文學然
既列禁近凡國家政治得失民生利害當知無不言昔
唐陸贄崔羣李絳在翰林皆能正言讜論補益當時汝
宜以古人自期已改監察御史建文時改左拾遺燕王

入召見不屈死之德彞死時兄弟並從京師嫂項家居
聞變度禍且族令闔舍逃去匿德彞二子山中毀戴氏
族譜獨身留家收者至無所得械項至京擄掠終無一
言戴族獲全時御史不屈死者有諸城謝昇聊城丁志
方而懷寧甘霖從容就戮子孫相戒不復仕又董鏞不
知何許人諸御史有志節者時時會鏞所誓以死報國
諸將校觀望不力戰鏞輒露章劾之城破被殺家戍極
邊而給事中死者則有陳繼之韓永葉福三人繼之莆

田人建文二年進士時江南僧道多腴田繼之請人限
五畝餘以賦民從之兵事亟數條奏機宜燕兵入不屈
見殺父母兄弟悉戍邊永西安人或曰浮山貌魁梧音
吐洪亮每慷慨論兵事燕王入欲官之抗辭不屈死福
侯官人繼之同年生燕兵至守金川門城陷死之

贊曰帝王成事蓋由天授成祖之得天下非人力所能
禦也齊黃方練之儔抱謀國之忠而乏制勝之策然其
忠憤激發視刀鋸鼎鑊甘之若飴百世而下凜凜猶有

生氣是豈泄然不恤國事而以一死自謝者所可同日
道哉由是觀之固未可以成敗之常見論也

明史卷一百四十一終

欽定四庫全書

明史卷一百四十一考證

齊泰傳洪武十七年舉應天鄉試第一名明年成進士

臣章宗瀛按名臣實錄名臣志鈔俱云泰洪武二

十年鄉貢明年舉進士獻徵錄明書皆同史獨作十

七年舉鄉試明年成進士考進士題名碑錄齊德更

名泰洪武十八年三甲一百名進士與史同但作溧

陽人不作溧水謹識闕疑

齊泰傳二十八年以兵部郎中擢左侍郎

臣章宗瀛

按名臣實錄獻徵錄俱云三十年陞兵部左侍郎明年進本部尚書明書所紀亦同惟左侍郎作右侍郎差誤耳獨史稱二十八年擢兵部左侍郎年分遲速迥殊謹識

齊泰傳時遺詔諸王臨國中毋奔喪

臣章宗瀛按明

書名臣實錄名臣志鈔獻徵錄俱云燕王入臨至淮安泰請急出符勒歸國王益恨泰史略之謹識

齊泰傳先是帝為太孫時諸王多擁屬擁重兵患之至是因密議削藩臣章宗瀛按名臣實錄明書俱云泰嘗使北平燕王賄泰泰受歸請為兵費上益重倚泰史略之謹識

黃子澄傳名湜以字行臣章宗瀛按明書子澄以字行改字伯淵謹附識

黃子澄傳曾有言周王橐不法者遂命李景隆帥兵襲執之臣章宗瀛按周王不法事史不詳原委考是

方孝儒傳洪武十五年以吳沈揭樞薦召見

臣章宗

瀛按洪武十五年孝儒以吳沈揭樞薦召見名臣實

錄名臣志鈔與史同惟明書云洪武十八年瀛入京

侍宴受命作靈芝甘露頌歸醉臥忘之孝儒為代之

瀛持入上覽曰此非學士筆也瀛以實對上曰良勝

汝召見試以一論五策立成上嘆曰異才也賜緋袍

腰帶猶平巾往見東宮宴禮部則潛使人歌所坐几

試之孝儒必正席乃坐上喜其端整而嫌其傲考明書略同惟賜宴後作罷歸斷又以吳沈揭樞薦召見與史互異謹識闕疑

方孝儒傳工文章醇深雄邁每篇出海內爭相傳誦永樂中藏孝儒文者罪至死門人王稔潛錄為侯城集故後得行於世

臣章宗瀛按名臣實錄名臣志

鈔明書皆云所著有遜志齋集四十卷史略之謹識方孝儒傳世宗時松江人俞斌自稱孝儒後一時士大

夫信之為纂歸宗錄既而方氏察其偽言於官乃已

臣章宗瀛按名臣實錄名臣志鈔俱云錄孝儒家時得魏典史澤周旋藏其幼子以故孝儒尚有結俞斌之事惟明書與史合謹識闕疑

方孝儒之死宗族親友前後坐誅者數百人

臣章宗

瀛按名臣實錄名臣志鈔明書明代紀事本末俱云宗族坐誅者八百七十三人史云數百人概詞也謹

識

方孝儒傳

盧原質附

燕兵不屈與弟原朴等皆被殺死

臣章宗瀛按原朴明書作原林謹識闕疑

方孝儒傳

盧原質鄭公智林嘉猷附

臣

章宗瀛按明

書盧原質鄭公智作寧海人林嘉猷作臨海人與史稍異惟明臣實錄與史同謹識闕疑

方孝儒傳

鄭居貞附

鄭居貞閩人

臣

章宗瀛按明書

鄭居貞初名久成後改恒以字行徽州人從官於閩因家焉史不詳其改之故且作閩人謹附識

方孝儒傳劉政附孝儒主順天鄉試所得士有長洲劉政臣章宗瀛按明書劉政建文己卯應天鄉試第

一考官方孝儒以托孤寄命命題得其文驚曰此他日臨大節而不可奪者一時稱為得人史略之謹識

練子寧傳族其家姻戚俱戍邊臣章宗瀛按練子寧

家考明書名臣實錄名臣志鈔明代紀事本末諸書俱云死者百五十一人戍邊者數百人較史稍詳謹識

練子寧傳燕王即位縛子寧至語不遜磔死 臣章宗

瀛按明書子寧被逮之前夕以血大書一練字於裙幅令侍媵抱匝歲子至民間得免展轉入閩傭保六世孫綺為新寧陳舉掌書記後白當事以幣聘之授衣巾奉先祠萬厯初詔錄諸臣後得子寧妾秦氏媾生成所者曰善慶俾主祀史略之謹識

練子寧傳

宋徵附

徵不知何許人

臣

章宗瀛按宋徵

明書名臣實錄明代紀事本末均不詳其邑里俱云

嘗言耿李諸將失律懷二心史略之謹識

茅大芳傳建文元年遷副都御史

臣章宗瀛按明書

作遷副都御史執法嚴正遷吏部左侍郎史略之謹

識

茅大芳傳

周璿附

臣章宗瀛按周璿明書作山東諸

城人謹識

茅大芳傳燕王稱帝與大芳並見収不屈死

臣章宗

瀛按明書茅大芳正德末祀於鄉郡人侍郎儲巖輯

其遺文曰希董集史略之謹識

卓敬傳卓敬字惟恭瑞安人

臣章宗瀛按明書卓敬

瑞安人後徙滄州謹識

卓敬傳他日與同官見適八十一人命改官為元士尋以六科為政事之本源又改曰源士已復稱給事中

臣章宗瀛按改給事中為源士又改源士事在洪

武二十二年見職官志謹識

卓敬傳

郭任盧迴任附

任與同官盧迴主調兵食京師

失守被擒不屈死之 臣章宗瀛按明書郭任嘉靖
中鎮江知府劉儲秀祀之鄉賢祠謹識

陳迪傳以通經薦歷官侍講 臣章宗瀛按明書名臣
實錄俱云十二年薦召為翰林編修遷侍經謹識

胡閏傳京師陷召閏不屈與子傳道俱死 臣章宗瀛

按明書作子傳慶與其族二百七十人皆市斬次子
傳福方戍雲南史云與子傳道俱死次子傳慶戍邊
且不及連坐之人彼此互異惟名臣實錄與史同謹

識

胡閏傳

高翔附

翔喪服入見語不遜族之

臣章宗瀛

按明書明代紀事本末俱云燕王入京著方孝儒草詔繼召閏及高翔皆衰經至哭聲徹殿陛太宗召閏先入諭今更服閏曰死即死服不可更史祇云翔喪服入見而不及閏草詔孝儒附傳但及樓璉而亦不及閏翔彼此互異謹識

王度傳

董鏞附

又董鏞不知何許人

臣章宗瀛按明

書董錦長沙人金川失守執殺之姻族死戍者二百
三十人史云不知何許人又不載連坐者謹識

明史卷一百四十一考證

欽定四庫全書

明史卷一百四十二

大學士張廷玉等奉 敕修

列傳第三十

鐵 鉉

暴 昭 侯泰

陳性善 崇

陳植王彬

張 昂 謝

葛誠貴彭二

宋 忠 余

瑱

馬 宣 曾

朱濬
石 卜 萬

瞿

能

莊得
王指揮

楚智
楊本

皂旂張

張倫

陳質

顏伯瑋

唐子清
鄭恕

黃謙
鄭華

向朴

王省

姚善錢芹

陳彥回

張彥方

鐵鉉鄧人洪武中由國子生授禮科給事中調都督府
斷事嘗讞疑獄立白太祖喜字之曰鼎石建文初為山
東參政李景隆之北伐也鉉督餉無乏景隆兵敗白溝

河單騎走德州城戍皆望風潰鉉與參軍高巍感奮涕
泣自臨邑趨濟南偕盛庸宋參軍等誓以死守燕兵攻
德州景隆走依鉉德州陷燕兵收其儲蓄百餘萬勢益
張遂攻濟南景隆復大敗南奔鉉與庸等乘城守禦燕
兵隄水灌城築長圍晝夜攻擊鉉以計焚其攻具間出
兵奮擊又遣千人出城詐降燕王大喜軍中皆懽呼鉉
伏壯士城上候王入下鐵板擊之別設伏斷橋既而失
約王未入城板驟下王驚走伏發橋倉卒不可斷王鞭

馬馳去憤甚百計進攻凡三閱月卒固守不能下當是時平安統兵二十萬將復德州以絕燕餉道燕王懼解圍北歸燕王自起兵以來攻真定二日不下即舍去獨以得濟南斷南北道即畫疆守金陵不難圖故乘大破景隆之銳盡力以攻期於必拔而竟為鉉等所挫帝聞大悅遣官慰勞賜金幣封其三世鉉入謝賜宴凡所建白皆採納擢山東布政使尋進兵部尚書以盛庸代景隆為平燕將軍命鉉參其軍務是年冬庸大敗燕王於

東昌斬其大將張玉燕王奔還北平自燕兵犯順南北日尋干戈而王師克捷未有如東昌者自是燕兵南下由徐沛不敢復道山東北燕兵漸逼帝命遼東總兵官楊文將所部十萬與鉉合絕燕後文師至直沽為燕將宋貴等所敗無一至濟南者四年四月燕軍南綴王師於小河鉉與諸將時有斬獲連戰至靈璧平安等師潰被禽既而庸亦敗績燕兵渡江鉉屯淮上兵亦潰燕王即皇帝位執之至反背坐廷中嫚罵令其一回顧終不

可遂磔於市年三十七子福安戍河池父仲名年八十
三母薛竝安置海南宋參軍者逸其名燕兵攻濟南不
克舍之南去參軍說鉉直搗北平鉉以卒困甚不果後
不知所終

暴昭潞州人洪武中由國子生授大理寺司務三十年
擢刑部侍郎明年進尚書耿介有峻節布衣麻履以清
儉知名建文初充北平採訪使得燕不法狀密以聞
請預為脩燕兵起設平燕布政司於真定昭以尚書掌

司事與鐵鉉輩悉心經畫平安諸軍敗名歸金川門陷
出亡被執不屈磔死繼昭為刑部尚書者侯泰字順泰
南和人以薦舉起家建文初仕至尚書燕王舉兵力主
抗禦之策嘗督餉於濟寧淮安京師不守行至高郵被
執下獄與弟敬祖子玘俱被殺

陳性善名復初以字行山陰人洪武三十年進士臚唱
過御前帝見其容止凝重屬目久之曰君子也授行人
司副遷翰林檢討性善工書嘗召入便殿繙錄誠意伯

劉基于璉所獻其父遺書帝威嚴見者多惴恐至惶汗不成一字性善舉動安詳字畫端好帝大悅賜酒饌留竟日出惠帝在東宮習知性善名及即位擢為禮部侍郎薦起流人薛正言等數人雲南布政使韓宜可隸謫籍亦以性善言起副都御史一日帝退朝獨留性善賜坐問治天下要道手書以進信善盡所言悉從之已為有司所格性善進曰陛下不以臣不肖猥承顧問既僭塵聖聽許臣必行未幾輟改事同反汗何以信天下帝

為勳容燕師起改副都御史監諸軍靈壁戰敗與大理
丞彭與明欽天監副劉伯完等皆被執已悉縱還性善
曰辱命罪也奚以見吾君朝服躍馬入於河以死餘姚
黃埤陳子方與性善友亦同死燕王入京師詔追戮性
善徙其家於邊與明萬安人貢入太學歷給事中建文
初為大理右丞廉勤敏達以督軍被執縱歸慚憤裂冠
裳變姓名與伯完俱亡去不知所終時以侍郎監軍者
有盧江陳植植元末舉鄉試不仕洪武間官吏部主事

建文二年官兵部右侍郎燕兵臨江植監戰江上慷慨
誓師部將有議迎降者植責以大義甚厲部將殺之以
降且邀賞燕王怒立誅部將具棺殮葬植白石山上燕
師之至江北也御史王彬巡按江淮駐揚州與鎮撫崇
剛嬰城堅守時盛庸兵既敗人無固志守將王禮謀舉
城降彬執之及其黨繫獄剛出練兵彬修守具晝夜不
懈有力士能舉千斤彬嘗以自隨燕兵飛書城中縛王
御史降者官三品左右憚力士莫敢動禮弟崇賂力士

母誘其子出乘彬解甲浴猝縛之出禮於獄開門納燕師彬與剛皆不屈死彬字文質東平人洪武中進士剛逸其里籍又兵部主事樊士信應城人守淮力拒燕兵不勝死之

張昂澤州人洪武中以人材累官工部右侍郎謝貴者不知所自起歷官河南衛指揮僉事建文初廷臣議削燕更置守臣乃以昂為北平布政使貴為都指揮使竝受密命時燕王稱疾久不出二人知其必有變乃部署

在城七衛及屯田軍士列九門防守將執王昺庫吏李友直預知其謀密以告王王遂得為備建文元年七月六日朝廷遣人逮燕府官校王偽縛官校置廷中將付使者紹昺貴入至端禮門為伏兵所執俱不屈死燕將張玉朱能等帥勇士攻九門克其八獨西直門不下都指揮彭二躍馬呼市中曰燕王反從我殺賊者賞集兵千餘人將攻燕府會燕健士從府中出格殺二兵遂散盡奪九門初昺被殺喪得還燕王即位出昺屍焚之家人

及近戚皆死葛誠不知所由進洪武末為燕府長史嘗
奉王命奏事京師帝召見問府中事誠具以實對遣還
王佯病盛暑擁爐坐呼寒甚曷貴等入問疾誠言王實
無病將為變又密疏聞於帝及曷貴將圖王誠與護衛
指揮盧振約為內應事敗誠振俱被殺夷其族又佯讀
余逢辰字彥章宣城人有學行王信任之以故得聞異
謀乘間力諫知變將作貽書其子誓必死兵起復泣諫
言君父兩不可負死之北平人杜奇者才雋士也燕王

起兵徵入府竒因極諫當守臣節王怒立斬之

宋忠不知何許人洪武未為錦衣衛指揮使有百戶以非罪論死忠疏救御史劾之太祖曰忠率直無隱為人請命何罪遂宥百戶尋為僉都御史劉觀所劾調鳳陽中衛指揮使三十年平羌將軍齊讓征西南夷無功以忠為叅將從將軍楊文討之師旋復官錦衣建文元年以都督奉勅總邊兵三萬屯開平悉簡燕府護衛壯士以從又以都督徐凱屯臨清耿璠屯山海關相犄角北

平故有永清左右衛忠調其左屯彰德右屯順德以備
燕及張曷謝貴謀執燕王忠亦帥兵趨北平未至而燕
兵起居庸失守不得進退保懷來燕王度忠必爭居庸
帥精兵八千卷甲倍道趨懷來時北平將士在忠部下
者忠告以家屬竝為燕屠滅盍努力復讎報國恩燕王
偵知之急命其家人張故旂幟為前鋒呼父兄子弟相
問勞將士咸喜曰我家國亡恙宋總兵欺我遂無鬪志
忠倉卒布陣未成烈燕王一麾渡河鼓譟進忠敗死之

忠之守懷來也都指揮余瑱彭聚孫泰與俱及戰瑱被
執不屈死泰中流矢血被甲裹創力鬪與聚俱沒於陣
當是時諸將校為燕所俘者百餘人皆不肯降以死惜
姓名多不傳

馬宣亦不知何許人官都指揮使宋忠之趨居庸宣亦
自薊州帥師赴北平聞變走還燕王既克懷來旋師欲
南下張玉進曰薊州外接大寧多騎士不取恐為後患
會宣發兵將攻北平與燕兵戰公樂驛敗歸與瑱撫曾

濬城守王等往攻之宣出戰被禽罵不絕口與濬俱死
燕兵之襲大寧也守將都指揮卜萬與都督劉真陳亨
帥兵扼松亭關亨欲降燕畏萬不敢發燕行反間貽萬
書盛稱萬極詆亨厚賞所獲大寧卒緘書衣中俾密與
萬故使同獲卒見之亦縱去而不與賞不得賞者發其
事真亨搜卒衣得書遂執萬下獄死籍其家萬忠勇而
死於間論者惜之及大寧陷指揮使朱鑑力戰不屈死
寧府左長使石撰者平定人以學行稱燕王舉兵撰輒

為守禦計每以臣節諷寧王王亦心敬之及城陷憤誓不屈支解死

瞿能合肥人父通洪武中累官都督僉事能嗣官以四川都指揮使從藍玉出大渡河擊西番有功又以副總兵討建昌叛酋伊魯特穆爾破之雙狼寨燕師起從李景隆北征攻北平與其子帥精騎千餘攻張掖門垂克景隆忌之令候大軍同進於是燕人夜汲水沃城方大寒冰凝不可登景隆卒致大敗已又從景隆進駐白溝

河與燕師戰能父子奮擊所向披靡日暝各收軍明日復戰燕王幾為所及王急佯招後軍以疑之得脫去薄暮能復引衆搏戰大呼滅燕斬馘數百諸將俞通淵滕聚復帥衆來會會旋風起王突入馳擊能父子死於陣通淵聚俱死精兵萬餘竝沒南軍由是不振時與北兵戰死者有都指揮莊得楚智皂旗張等得故隸宋忠懷來之敗一軍獨全後從盛庸戰夾河斬燕將譚淵已而燕王以驍騎乘暮掩擊得力戰死智嘗從馮勝藍玉出

塞有功建文初守北平尋召還及討燕帥兵從景隆戰
輒奮勇北人望旂幟股栗至是馬陷被執死皂旗張逸
其名或曰張能力挽千斤每戰輒麾皂旗先驅軍中呼
皂旗張死時猶執旗不仆又王指揮者臨淮人常騎小
馬軍中呼小馬王戰白溝河被重創脫胄付其僕曰吾
為國捐軀以此報家人立馬植戈而死二人死尤異云
又中年楊本初為太學生通禽遁術應募授錦衣鎮撫
從景隆討燕有功景隆忌之不以聞尋劾景隆喪師辱

國遂以孤軍獨出被禽繫北平獄後被殺

張倫不知何許人河北諸衛指揮使也勇悍負氣喜觀古忠義事馬宣自薊州起兵攻北平不克死倫發憤合兩衛官帥所部南奔結盟報國從李景隆盛庸戰皆有功燕王即帝位招倫降倫笑曰張倫將自賣為丁公乎死之京師陷武臣皆降附從容就義者倫一人而已又陳質者以叅將守大同進中軍都督同知助宋忠保懷來忠敗退守大同代王欲舉兵應燕質持之不得發及

顏伯瑋名瓌以字行廬陵人唐魯國公真卿後建文元年以賢良徵授沛縣知縣李景隆屯德州沛人終歲輓運伯瑋善規畫得不困會設豐沛軍民指揮司乃集民兵五千人築七堡為備禦計尋調其兵益山東所存疲弱不任戰燕兵攻沛伯瑋遣縣丞胡先間行至絳州告急援不至遂命其弟珏子有為還家侍父題詩公署壁

上誓必死燕兵夜入東門指揮王顯迎降伯瑋冠帶升堂南向拜自經死有為不忍去復還見父屍自刎其側主簿唐子清典史黃謙俱被執燕將欲釋子清子清曰願隨顏公地下遂死之遣謙往徐州招降謙不從亦死又向朴慈谿人力學養親洪武末以人才召見知獻縣縣無城郭燕將譚淵至朴集民兵與戰被執懷印死鄭恕仙居人蕭縣知縣燕將王聰破蕭不屈死二女當配亦死之鄭華臨海人由行人貶東平吏目燕兵至州長

貳盡棄城走華謂妻蕭曰吾義必死奈若年少何蕭泣曰君不負國妾敢負君華曰足矣帥吏民憑城固守城破力戰不屈死

王省字子職吉水人洪武五年領鄉舉至京詔免會試命吏部授官省言親老乞歸養尋以文學徵太祖親試稱旨當殊擢自陳才薄親老乞便養授浮梁教諭凡三為教官最後得濟陽燕兵至為游兵所執從容引譬詞義慷慨衆舍之歸坐明倫堂伐鼓聚諸生謂曰若等知

此堂何名今日君臣之義何如因大哭諸生亦哭省以頭觸柱死女靜適即墨主簿周岐鳳聞燕兵至濟陽知父必死三遣人往訪得遺骸歸葬

姚善字克一安陸人初姓李洪武中由鄉舉歷祁門縣丞同知廬州重慶二府三十年遷蘇州知府初太祖以吳俗奢僭欲重繩以法黠者更持短長相攻訐善為改持大體不為苛細訟遂衰息吳中大治好折節下士敬禮隱士王賓韓奕俞貞木錢芹輩以月朔會學宮迎芹

上座請質經義芹曰此非今所急也善悚然起問芹乃授以一冊視之皆守禦策時燕兵已南下密結鎮常嘉松四郡守練民兵為備薦芹於朝署行軍斷事善尋至京師會朝廷以燕王上書貶齊泰黃子澄於外善言不當貶遂復名二人建文四年詔兼督蘇松常鎮嘉興五府兵勤王兵未集燕王已入京師時子澄匿善所約共航海起兵善謝曰公朝臣當行收兵圖興復善守土與城存亡耳子澄去善為麾下許千戶者縛以獻不屈死

年四十三子節等四人俱戍配芹字繼忠少好奇節元
末子諸將不遇洪武初辟大都督府掾從中山王出北
平至大漠還解職家居二十年甘貧樂道以善薦起從
李景隆北行遣入奏事道病將卒猶條上兵事年七十

三

陳彥回字士淵蒲田人父立誠為歸安縣丞被誣論死
彥回謫戍雲南家人從者多道死比至蜀唯彥回與祖
母郭在會赦又弗原監送者憐而縱之貧不能歸依鄉

人知縣黃積良冒黃姓久之以閭中教諭嚴德政薦授
保寧訓導考滿至今召見以為平江知縣逾年太祖崩
彥回入臨又以給事中楊維康薦擢徽州知府建文元
年以循良受上賞祖母郭卒當去百姓走京師乞留彥
回哀經赴闕自陳乞復姓當彥回之戍雲南也其弟彥
困亦戍遼東至是詔除彥困籍連乞終喪不許葬郭微
城北十里北山之陽時走墓下哭甚哀人目之曰太守
山嘗對百姓泣曰吾罪人也向亡命冒他姓以祖母存

恐陳首獲罪隱忍二十年今祖母沒宜自請死上特宥
我終當死報國耳燕兵逼京師彥回糾義勇赴援已而
被禽械至京死之張彥方龍泉人初為給事中以便養
乞改樂平知縣應詔勤王帥所部抵湖口被執械至樂
平斬之梟其首譙樓當暑月一蠅不集經旬面如生色
人竊葬之清白堂後同時以勤王死者有松江同知死
尤烈云同知姓名不可考或曰周繼瑜也勤王詔下榜
募義勇入援極言大義感動人心并斥北平兵乖恩悖

道械至京磔於市

贊曰燕師之南嚮也連敗二大將其鋒蓋不可當鐵鉉以書生竭力抗禦於齊魯之間屢挫燕衆設與耿李易地而處天下事固未可知矣張曷謝貴葛誠圖燕於肘腋而事不就宋忠馬宣東西繼敗瞿能諸將垂勝戰亡燕兵卒得長驅南下而姚善陳彥回之屬欲以郡邑之甲奮拒於大勢已去之後此黃鉞所謂兵至江南禦之無及者也

明史卷一百四十二

欽定四庫全書

明史卷一百四十二考證

鐵鉉傳鐵鉉鄧人臣方煒按明書鐵鉉祖父係色目人別居鄧州因為鄧州人他書無可考謹識

鐵鉉傳凡三閱月卒固守不能下臣方煒按明書云鉉令守陴者羣噪罵燕兵攻益急以大礮攻城城且破鉉復多書高皇帝神牌懸受擊處遂不敢擊明代紀事本末皆同史略之謹識

鐵鉉傳子福安戍河池 臣方煒按明書男福安十二
編伍河池康安七歲充匠尋皆戮死妻楊并二女發
教坊司楊憂憤死二女終不受辱成祖聞曰彼竟不
屈耶出之皆適士人較史特詳謹識

鐵鉉傳參軍說鉉直搗北平 臣方煒按明書名臣實

錄俱云宋參軍說鉉曰北兵去濟而南其留守北平
者類老弱且永平保定離畔雖郡縣堅守者尚多守
臣郭資輩書生不知兵公能出奇兵疾馳真定我諸

將潰逸者稍稍收合不數日竟取北平其間豪傑有
聞義而起者便宜署部招徠之北平可破也破則北
兵顧家室必辭勢必散歸徐沛間素稱驍捷若檄諸
守臣倡集義勇乘勢晝夜攝之而公館穀北平休養
士馬逆其至擊之彼腹背受敵大難旦夕平耳鉉以
軍餉盡於德州城守既久士卒憊甚而南將皆駑材
無足恃莫若固守濟南使江淮有備北兵不能越淮
歸必道濟吾邀而擊之以逸待勞全勝計也名臣志

鈔明代紀事本末俱同較史文略詳謹識

慕昭傳慕昭潞州人

臣方煒按慕昭史作潞州人不

詳其邑考明書獻徵錄俱作浮山人浮山隸平陽不
隸潞州又考地里志潞州洪武八年陞潞安府不應
仍稱潞州謹識闕疑

慕昭傳設平燕布政司於真定昭以尚書掌司事

臣

方煒按明書獻徵錄俱作歷北平布政司參政二十
八年陞刑部尚書年分官階俱與史小異七卿年表

與史同謹附識

陳性善傳洪武三十年進士

臣方煒按陳性善明書

洪武十八年進士考十八年歲在乙丑而名臣實錄

亦作十八年進士惟史作三十年進士題名碑記與

史同考太祖在位三十一年性善以進士授行人司

副遷翰林檢討召入便殿繙錄似非一載所歷之事

謹識闕疑

陳性善傳及即位擢為禮部侍郎

臣方煒按性善擢

即位後事年分迥殊謹識闕疑

陳性善傳性善盡所言

臣方煒按性善盡所言語意

不甚明晰考明書云問以治天下之要使書以進性善益感知遇盡所欲言上面允行而中多止較史特為曉暢謹識

陳性善傳

崇剛附

御史王彬巡按江淮駐揚州與鎮撫

崇剛嬰城堅守

臣方煒按鎮撫崇剛明書作指揮

鄧崇剛與史小異惟名臣實錄祇作崇剛與史同謹識

張昺傳累官工部右侍郎臣方煒按張昺明書名臣實錄俱作累官刑部左侍郎與史不符謹識

張昺傳

彭二附

都指揮彭二

臣方煒按明書彭二逸

其名以行稱謹識

馬宣傳宋忠之趨居庸宣亦自薊州帥師赴北平臣

方煒按惠帝本紀馬宣戰死之後燕兵始陷居庸懷

來宋忠見執前後俱按日編載憲章錄亦同此傳作克懷來後納張王之謀始與宣戰與本紀不等謹識

闕疑

瞿能傳與其子帥精騎千餘攻張掖門 臣方煒按明書云能從李景隆攻北平力戰勢甚銳與其子獨帥精騎千餘人殺入彰義門彰義門金之西門元所謂南城也今之廣寧門人猶呼為彰義外城雖建於嘉靖時意金城故址在明初猶存史作張掖音轉之訛

耳疑卽彰義他書但無可証謹識闕疑

顏伯瑋傳遂命其弟珏子有為還家侍父臣方煒按
明書珏脫走濟寧踰還沛詢邑人知父子屍已為縣
丞胡先埋瘞乃至徐告守晏壁壁因為壞傳名臣實
錄同史畧之謹附識

顏伯瑋傳

向朴鄭恕鄭華附

知獻縣

臣方煒按明書

朴本獻縣後俱祀祠朴萬歷初奉詔建祠本縣北門
外又恕祀台八忠祠史俱略之謹附識

顏伯瑋傳

鄭華附

華謂妻蕭曰吾義必死

臣方煒按

鄭華之妻名臣實錄云華死乃稱病送還家又考明書獻徵錄俱云以家托其友人無錫丞趙次進其時未同死也史略之謹附識

王省傳詔免會試 臣方煒按太祖本紀選舉志俱云六年三月諭暫罷科舉察舉賢才與此傳合謹識

姚善傳敬禮隱士王賓

臣方煒按明書王賓字仲光

獨居陋巷善恭往候舍車徒步叩門自稱名延入語

盡歡及賓報謁望門再拜而返善自邀還辭非公事不敢入又將候韓奕奕避入太湖善歡曰先生可謂名可聞而面不可見者耶較史為詳謹附識

姚善傳

錢芹附

薦芹於朝署行軍斷事

臣方煒按職

官志祇有五軍斷事之名不載行軍斷事當屬一時權設之官非經久制也謹識

陳彥回傳父立誠為歸安縣丞被誣論死

臣方煒按

立誠之死明書獻徵錄名臣實錄與此史同不詳所

誣之事無憑考核謹識闕疑

陳彥回傳依鄉人知縣黃積良冒黃姓 臣方煒按彥

回依積良更姓名曰黃禮見明書謹識

陳彥回傳授保寧訓導 臣方煒按保寧訓導考明書

作保府學訓導與史小異謹識闕疑

陳彥回傳 張彥方附 應詔勤王帥所部抵湖口被執械

至樂平斬之 臣方煒按明書獻徵錄明代紀事本

末俱云彥方糾義起兵一邑嚮應或沮之彥方大哭

曰君父在水火吾可以自緩乎史略之謹識

陳彥回傳

張彥方附

抵湖口被執

臣方燁按抵湖口

被執明書獻徵錄明代紀事本末俱作江口考地里
志湖口縣濱臨江口諸書與史當是互舉成文耳謹
識

明史卷一百四十二考證

欽定四庫全書

明史卷一百四十三

大學士張廷玉等奉 敕修

列傳第三十一

王 艮 高遜志

廖 昇 魏

冕

鄒

瑾

周是修

程本立

黃 觀

王叔英 林

英

黃 鉞 曾鳳韶

王 良

陳思賢

龍溪六生
台溫二樵

程

通

黃希范
黃彥清

葉惠仲
蔡運

石允常

高

巍

韓郁

高賢寧

王

璉

周縉

牛景先

程濟等

王良字敬止吉水人建文二年進士對策第一貌寢易以胡靖即胡廣也良次之又次李貫三人皆同里並授修撰如洪武中故事設文史館居之預修太祖實錄及類要時政記諸書一時大著作皆綜理之數上書言時

務燕兵薄京城艮與妻子訣曰食人之祿者死人之事
吾不可復生矣解縉吳溥與艮靖比舍居城陷前一夕
皆集溥舍縉陳說大義靖亦奮激慷慨艮獨流涕不言
三人去溥子與弼尚幼歎曰胡叔能死是大佳事溥曰
不然獨王叔死耳語未畢隔牆聞靖呼外喧甚謹視豚
溥顧與弼曰一豚尚不能舍肯舍生乎須臾艮舍哭飲
鴆死矣縉馳謁成祖甚喜明日薦靖召至叩頭謝貫亦
迎附後成祖出建文時羣臣封事千餘通令縉等編閱

事涉兵農錢穀者留之諸言語干犯及他一切皆焚毀
因從容問貫縉等曰爾等宜皆有之衆未對貫獨頓首
曰臣實未嘗有也成祖曰爾以無為美耶食其祿任其
事當國家危急官近侍獨無一言可乎朕特惡其誘建
文壞祖法亂政者耳後貫遷中允坐累死獄中臨卒歎
曰吾愧王敬止矣有高遜志者艮座主也蕭縣人寓嘉
興幼嗜學師貢師泰周伯琦等文章典雅成一家言徵
修元史入翰林累遷試吏部侍郎以事謫朐山建文初

名為太常少卿與董倫同主會試得士自艮外胡靖吳溥楊榮金幼孜楊溥胡濬顧佐等皆為名臣燕師入存歿無可考

廖昇襄陽人不知其所以進學行最知名與方孝孺王紳相友善洪武末由左府斷事擢太常少卿建文初修太祖實錄董倫王景為總裁官昇與高遜志為副總裁官李貫王紳胡子昭楊士奇羅恢程本立為纂修官皆一時選燕師渡江朝廷遣使請割地不許昇聞而慟哭

與家人訣自縊死殉難諸臣昇死最先其後陳瑛奏諸臣逆天命致死建文君請行追戮亦首及昇云時為瑛追論者有魏冕等冕官御史燕兵犯闕都督徐增壽徘徊殿廷有異志冕率同官毆之與大理丞鄒瑾大呼請速加誅明日宮中大起有勸冕降者厲聲叱之遂自殺瑾亦死瑾冕皆永豐人其同里鄒杓官秦府長史聞瑾死憤甚不食卒或曰即瑾子也又都給事中龔泰義烏人由鄉薦起家燕王入金川門泰被縛以非奸黨釋不

殺自投城下死秦嘗遊學宮狂人擠之溺池中幾死弗校人服其量

周是修名德以字行奉和人洪武末舉明經為霍邱訓導太祖問家居何為對曰教人子弟孝弟力田太祖喜擢周府奉祀正逾年從王北征至黑山還遷紀善建文元年有告王不法者官屬皆下吏是修以嘗諫王得免改衡府紀善衡王惠帝母弟未之藩是修留京師預翰林纂修好薦士陳說國家大計燕兵渡淮與蕭用道上

書指斥用事者用事者怒共挫折之是修屹不為動京
城失守留書別友人江仲隆解縉胡靖蕭用道楊士奇
付以後事具衣冠為贊繫衣帶間入應天府學拜先師
畢自經於尊經閣年四十九燕王即帝位陳瑛言是修
不順天命請追戮帝曰彼食其祿自盡其心勿問是修
外和內剛志操卓犖非其義一介不苟得也嘗曰忠臣
不計得失故言無不直烈女不慮死生故行無不果嘗
輯古今忠節事為觀感錄其學自經史百家陰陽醫卜

靡不通究為文援筆立就而雅贍條達初與士奇縉靖
及金幼孜黃淮胡儼約同死臨難惟是修竟行其志云
程本立字原道崇德人先儒頤之後父得剛負才氣不
仕元將路成兵過皂林暴掠德剛為陳利害成悅戢其
部衆欲奏官之辭去本立少有大志讀書不事章句善
海鹽沈壽康壽康嘗謂之曰學者爭務科舉以窮經為
名而無實學子質近厚當志聖賢之學本立益自力聞
金華朱克修得朱子之傳於許謙往從之遊舉明經秀

才除秦府引禮舍人賜楮幣鞍馬母憂去官服除補周府禮官從王之開封二十年春進長史從王入覲坐累謫雲南馬龍他郎甸長官司吏目留家大梁携一僕之任土酋施可伐煽百夷為亂本立單騎入其巢諭以禍福諸酋咸附未幾復變西平侯沐英布政使張統知本立賢屬行縣典兵事且撫且禦自楚雄至姚安抵大理永昌鶴慶麗江山行野宿往來綏輯凡九年民夷安業三十一年奏計京師學士董倫府尹向寶交薦之徵入翰

林預修太祖實錄遷右僉都御史俸入外不通餽遺建
文三年坐失陪祀貶官仍留纂修實錄成出為江西副
使未行燕兵入自縊死

黃觀字伯瀾一字尚賓貴池人父贊許從許姓受學於
元待制黃昇昇死節觀益自勵洪武中貢入太學繪父
母墓為圖瞻拜輒淚下二十四年會試廷試皆第一累
官禮部右侍郎乃奏復姓建文初更官制左右侍中次
尚書改觀右侍中與方孝孺等並親用燕王舉兵觀草

制諷其散軍歸藩東身謝罪辭極抵牾四年奏召募兵
上游且督諸郡兵赴援至安慶燕王已渡江入京師下
令暴左班文職奸臣罪狀觀名在第六既而索國寶不
知所在或言已付觀出收兵矣命有司追捕收其妻翁
氏并二女給象奴奴索釵釧市酒肴翁氏悉與之持去
急携二女及家屬十人投淮清橋下死觀聞金川門不
守歎曰吾妻有志節必死招魂葬之江上命舟至羅刹
磯朝服東向拜投湍急處死觀弟觀先匿其幼子逃他

處或云觀妻畢氏孀居母家遺腹生子故黃氏有後於
貴池初觀妻投水時嘔血石上成小影陰雨則見相傳
為大士像僧舁至庵中翁氏見夢曰我黃狀元妻也此
明沃以水影愈明有愁慘狀後移至觀祠名翁夫人血
影石今尚存

王叔英字原采黃巖人洪武中與楊大中葉見泰方孝
孺林右並徵至叔英固辭歸二十年以薦為仙居訓導
改德安教授遷漢陽知縣多惠政歲旱絕食以禱立應

建文時召為翰林修撰上資治八策曰務學問謹好惡
辨邪正納諫諍審才否慎刑罰明利害定法制皆援証
古今可見之行事又曰太祖除奸剔穢抑強鋤梗如醫
去病如農去草去病急或傷體膚去草嚴或傷禾稼病
去則宜調變其血氣草去則宜培養其根苗帝嘉納之
燕兵至淮奉詔募兵行至廣德京城不守會齊泰來奔
叔英謂泰貳心欲執之泰告以故乃相持慟哭共圖後
舉已知事不可為沐浴更衣冠書絕命詞藏衣裾間自

經於元妙觀銀杏樹下天台道士盛希年葬之城西五里其詞曰人生穹壤間忠孝貴克全嗟予事君父自省多過愆有志未及竟竒疾忽見纏肥甘空在案對之下咽意者造化神有命歸九泉嘗念夷與齊餓死首陽巔周粟豈不佳所見良獨偏高蹤渺難繼偶爾無足傳千秋史官筆慎勿稱希賢又題其案曰生既已矣未有補於當時死亦徒然庶無愧於後世燕王稱帝陳瑛簿錄其家妻金氏自經死二女下錦衣獄赴井死叔英與

孝儒友善以道義相切劘建文初孝儒欲行井田叔英
貽書曰凡人有才固難能用其才尤難子房於漢高能
用其才者也賈誼於漢文不能用其才者也子房察高
帝可行而言故高宗用之一時受其利雖親如樊鄴信
如平勃任如蕭曹莫得間焉賈生不察而易言且言之
太過故絳灌之屬得以短之方今明良相值千載一時
但事有行於古亦可行於今者夏時周冕之類是也有
行於古不可行於今者井田封建之類是也可行者行

則人之從之也易而民樂其利難行而行則從之也難而民受其惠時井田雖不行然孝儒卒用周官更易制度無濟實事為燕王藉口論者服叔英之識而惜孝儒不能用其言也時御史古田林英亦在廣德募兵知事無濟再拜自經妻宋氏下獄亦自經死

黃鉞字叔揚常熟人少好學家有田在葛澤陂鉞父令督耕其中鉞從友人家借書竊讀不廢縣舉賢良授宜章典史建文元年舉湖廣鄉試明年賜進士授刑科給

事中三年丁父憂方孝孺弔之屏人問曰燕兵日南蘇
常鎮江京師左輔也君吳人朝廷近臣今雖去宜有以
教我錢曰三府唯鎮江最要害守非其人是撒垣而納
盜也指揮童俊狡不可任奏事上前視遠而言浮心不
可測也蘇州知府姚善忠義激烈有國士風然仁有餘
而禦下寬恐不足定亂且國家大勢當守上游兵至江
南禦之無及也孝孺乃因錢附書於善善得書與錢相
對哭誓死國錢至家依父殯以居燕兵至江上善受詔

統兵勤王以書招鉞鉞知事不濟辭以營葬畢乃赴既
而童俊果以鎮江降燕鉞聞國變杜門不出明年以戶
科左給事中召半途自投於水以溺死聞故其家得不
坐曾鳳韶廬陵人洪武末年進士建文初嘗為監察御
史燕王稱帝以原官召不赴又以侍郎召知不可免乃
刺血書衣襟曰予生廬陵忠節之邦素負剛鯁之腸讀
書登進士第仕宦至錦衣郎既一死之得宜可以含笑
於地下而不愧吾文天祥囑妻李氏子公望勿易我衣

即以此殮遂自殺年二十九李亦守節死

王良字天性祥符人洪武末累官僉都御史坐緩其僚友獄貶刑部郎中建文中厯遷刑部左侍郎議減燕府人罪不稱旨出為浙江按察使燕王即位頗德之遣使召良良執使者將斬之衆劫之去良集諸司印於私第將自殺未即決妻問故曰吾分應死未知所以處汝耳妻曰君男子乃為婦人謀乎饋良食食已抱其子入後園置子池旁投水死良殮妻畢以子付友人家遂積薪

自焚印毀成祖曰死固良分朝廷印不可毀可毀印良
不得無罪徙其家於邊

陳思賢茂名人洪武末為漳州教授以忠孝大義勗諸
生每部使者蒞漳叅謁時必請曰聖躬安否燕王登極
詔至慟哭曰明倫之義正在今日堅卧不迎詔率其徒
伍性原陳應宗林珏鄒君默曾廷瑞呂賢六人即明倫
堂為舊君位哭臨如禮有司執之送京師思賢及六生
皆死六生皆龍溪人嘉靖中提學副使邵銳立祠祀思

賢以六生侑食又台州有樵夫日負薪入市口不貳價
聞燕王即帝位慟哭投東湖死而温州樂清亦有樵夫
聞京師陷其鄉人卓侍郎敬死號慟投於水二樵皆逸
其名

程通績溪人嘗上書太祖乞除其祖戍籍詞甚哀竟獲
請已授遼府紀善燕師起從王泛海歸京師上封事數
千言陳禦備策進左長史永樂初從王徙荊州有言其
前上封事多指斥者械至死於獄家屬戍邊并捕其友

人徽州知府黃希范論死籍其家葉惠仲臨海人與兄
見泰並有文名以知縣徵修太祖實錄遷知南昌府永
樂元年坐直書燕兵事族誅黃彥清歛人官國子博士
以名節自勵坐在梅殷軍中私謚建文帝誅死蔡運南
康人官四川參政勁直不諧於俗罷歸復起知賓州有
惠政永樂初亦追論奸黨死石允常寧海人洪武二十
七年進士官河南僉事廉介有聲坐事謫常州同知建
文末帥兵防江軍潰棄官去後追錄廢周藩事繫獄二

年免死戍邊

高魏遼州人尚氣節能文章母蕭氏有痼疾魏左右侍奉至老無少懈母死蔬食廬墓三年洪武中旌孝行由太學生試前軍都督府左斷事疏墾河南山東北平荒田又條上抑未技慎選舉惜名器數事太祖嘉納之尋以決事不稱旨當罪減死戍貴州闕索嶺特許弟姪代役曰旌孝子也及惠帝即位上疏乞歸田里未幾遼州知州王欽應詔辟魏魏因赴吏部上書論時政用事者

方議削諸王獨魏與御史韓郁先後請加恩畧曰高皇帝分封諸王比之古制既皆過當諸王又率多驕逸不法違犯朝制不削朝廷綱紀不立削之則傷親親之恩賈誼曰欲天下治安莫如衆建諸侯而少其力今盡師其意勿行晁錯削奪之謀而效主父偃推恩之策在北諸王子弟分封於南在南子弟分封於北如此則藩王之權不削而自削矣臣又願益隆親親之禮歲時伏臘使人餽問賢者下詔褒賞之驕逸不法者初犯容之再

犯赦之三犯不改則告太廟廢處之豈有不順服者哉
書奏帝領之已而燕兵起命從李景隆出師參贊軍務
魏復上書言臣願使燕感披忠膽陳義禮曉以禍福以
親親之誼令休兵歸藩帝壯其言許之魏至燕自稱國
朝處士高巍再拜上書燕王殿下太祖上賓天子嗣位
布維新之政天下受戴皆曰內有聖明外有藩翰成康
之治再見於今矣不謂大王顯與朝廷絕張三軍抗六
師臣不知大王何意也今在朝諸臣文者智輅武者勇

奮執言仗義以順討逆勝敗之機明於指掌皆云大王藉口誅左班文臣實則吳王濞故智其心路人所共知魏竊恐奸雄無賴乘隙奮擊萬一有失大王得罪先帝矣今大王據北平取密雲下永平襲雄縣掩真定雖易若建瓴然自興兵以來業經數月尚不能出叢爾一隅地且大王所統將士計不過三十萬以一國有限之衆應天下之師亦易罷矣大王與天子義則君臣親則骨肉尚生離間况三十萬異姓之士能保其同心協力效

死於殿下乎魏每念至此未始不為大玉灑泣流涕也
願大王信魏言上表謝罪再修親好朝廷鑒大王無他
必蒙寬宥太祖在天之靈亦安矣倘執迷不悟舍千乘
之尊捐一國之富恃小勝忘大義以寡抗衆為僥倖不
可成之悖事魏不知大王所稅駕也況大喪未終毒興
師旅其與泰伯夷齊求仁讓國之義不大逕庭乎雖大
王有肅清朝廷之心天下不無簒奪嫡統之議即幸而
不敗謂大王何如人魏白髮書生蜉蝣微命性不畏死

洪武十年年蒙太祖高皇帝旌臣孝行魏竊自負既為
孝子當為忠臣死忠死孝魏至願也如蒙賜死獲見太
祖在天之靈魏亦可以無愧矣書數上皆不報已而景
隆兵敗魏拔旅南歸至臨邑遇參政鐵鉉相持痛哭奔
濟南誓死拒守屢敗燕兵及京城破魏自經死驛舍郁
疏畧曰諸王親則太祖遺體貴則孝康皇帝手足尊則
陛下叔父使二帝在天之靈子孫為天子而弟與子遭
殘戮其心安乎臣每念至此未嘗不流涕也此皆豎儒

偏見病藩封太重疑慮太深乃至此夫唇亡齒寒人人自危周王既廢湘王自焚代府被推而齊臣又告王反矣為計者必曰兵不舉則禍必如是朝廷執政激之使然燕舉兵兩月矣前後調兵不下五十餘萬而一矢無獲謂之國有謀臣可乎經營既久軍興輒乏將不效謀士不效力徒使中原赤子困於轉輸民不聊生其弊日甚一日九重之憂方深而出入帷幄與國事者方且揚揚自得彼其勸陛下削藩國者果何心哉諺曰親者割

之不斷疎者續之不堅殊有理也陛下不察不待十年
悔無及矣臣至愚感恩至厚不敢不言幸少垂洞鑒興
滅繼絕釋代王之囚封湘王之墓還周王於京師迎楚
蜀為周公俾各命世子持書勸燕罷兵守藩以慰宗廟
之靈明詔天下撥亂反正篤厚親親宗社幸甚不聽燕
師渡江都棄官遁去不知所終

高賢寧濟陽儒學生嘗受學于教諭王省以節義相砥
礪建文中貢入太學燕兵破德州圍濟南賢寧適在圍

中不及赴是時燕兵勢甚張黃子澄等謀遣使議和以
怠之尚寶司丞李得成者慷慨請行見燕王城下王不
聽圍益急參政鐵鉉等百計禦之王射書城中諭降賢
寧作周公輔成王論射城外王悅其言為緩攻相持兩
月卒潰去燕王即位後賢寧被執入見成祖曰此作論
秀才耶秀才好人予一官賢寧固辭錦衣衛指揮紀綱
故劣行被黜生也素與賢寧善勸就職賢寧曰君為學
校所棄故應爾我食廩有年義不可且嘗辱王先生之

教矣網為言於帝竟得歸年九十七卒

王璉字器之日照人博通經史尤長於春秋初為教授坐事謫遠方洪武末以賢能薦授寧波知府夜四鼓即秉燭讀書聲徹署外間詣學課諸生諸生率四鼓起誦習無敢懈毀境內淫祠三皇祠亦在毀中或以為疑璉曰不當祠而祠曰淫不得祠而祠曰潰惟天子得祭三皇於士庶人無預毀之何疑自奉儉約一日饌用魚羹璉謂其妻曰若不憶吾啖草根時耶命撒而埋之人號

埋羹太守燕師臨江璉造舟艦謀勤王為衛卒縛至京
成祖問造舟何為對曰欲泛舟趨瓜洲阻師南渡耳帝
亦不罪放還里以壽終

周縉字伯紳武昌人以貢入太學授永清典史攝令事
成祖舉兵守令相率迎降永清地尤近縉獨為守禦計
已度不可為懷印南奔道聞母卒歸終喪燕兵已迫糾
義旅勤王聞京師不守乃走匿吏部言前北平所屬州
縣朱寧等二百九十人當皇上靖難俱棄官職逃亡宜

寘諸法詔令入粟贖罪遣戍興州有司遂捕縉械送戍
所居數歲子代還年八十而沒朱寧等皆無考

牛景先不知何許人官御史金川門開易服宵遁卒於
杭州僧寺已而窮治齊黃黨籍其家燕兵之入一夕朝
臣縋城去者四十餘人其姓名爵里莫可得而考然世
相傳有程濟及河西傭補鍋匠之屬程濟朝邑人有道
術洪武末官岳池教諭惠帝即位濟上書言某月某日北
方兵起帝謂非所宜言逮至將殺之濟大呼曰陛下幸

囚臣臣言不驗死未晚乃下之獄已而燕兵起釋之改
官編修參北征軍淮上敗召還或曰徐州之捷諸將樹
碑紀功濟一夜往祭人莫測後燕王過徐見碑大怒趣
左右推之再推遽曰止為我錄文來已按碑行誅無得
免者而濟名適在推脫處然考其實徐州未嘗有捷也
金川門啟濟亡去或曰帝亦為僧亡去濟從之莫知所
終河西傭不知何許人建文四年冬披葛衣行乞金城
市中已至河西為傭於莊浪魯氏取直買羊裘而以故

葛衣覆其上破縷縷不肯棄刀作倦輒自吟哦或夜聞其哭聲久之有京朝官至識傭欲與語走南山避之或問京朝官傭何人亦不答在莊浪數年得病且死呼主人屬曰我死勿殮西北風起火我勿埋我骨魯家從其言補鍋匠者常往來夔州重慶間業補鍋凡數年川中人多識之一日於夔州市遇一人相顧愕然已相持哭共入山巖中坐語竟日復相持哭別去其人即馮翁也翁在夔以章句授童子給衣食能為古詩詩後題馬二

子或馬公或塞馬先生後二人皆不知所終又會稽有二隱者一雲門僧一若耶溪樵僧每泛舟賦詩歸即焚之樵每於溪沙上以荻畫字已輒亂其沙人有疑之者從後挹持觀之則皆孤臣去國之詞也時又有玉山樵者居金華之東山麻衣戴笠終身不易嘗為王姓者題詩曰宗人故疑其王姓云雪庵和尚人疑其為葉希賢見練子寧傳其後數十年松陽王詔游治平寺于轉輪藏上得書一卷載建文亡臣二十餘人事蹟楮墨斷爛

可識者僅九人梁田玉梁良玉梁良用梁中節皆定海人同族同仕於朝田玉官郎中京師破去為僧良玉官中書舍人變姓名走海南鬻書以老良用為舟師死於水中節好老子太元經為道士何申宋和郭節皆不知何許人同官中書申使蜀至峽口聞變嘔血疽發背死和及節挾及節書走異域客死何洲海州人不知何官亦去為卜者客死郭良官籍俱無可考與梁中節相約棄官為道士餘十一人並失其姓名縉雲鄭僖紀其事為

之茅山道士中建文時侍書吳江史仲彬所述紀帝出
亡後事甚具仲彬程濟葉希賢牛景先皆從亡之臣又
有廖平金焦諸姓名而雪庵和尚補錫匠等具有姓名
官爵一時士大夫皆信之給事中歐陽律調上其書于
朝欲為請謚立祠然考仲彬實未嘗為侍書錄蓋晚出
附會不足信

贊曰燕兵之入朝臣多捐軀殉國若王艮以下諸人之

從容就節非大義素明者不能也高魏一介布衣慷慨
上書請歸藩服其持論甚偉又能超然遠引晦跡自全
可稱奇士若夫行邀諸賢雖其姓字雜出於諸家傳紀
未足徵信而忠義奇節人多樂道之者傳曰與其過而
去之寧過而存之亦足以扶植綱常使懦夫有立志也



明史卷一百四十三

欽定四庫全書

明史卷一百四十三考證

王艮傳並授修撰如洪武中故事

臣嚴福按洪武四

年雖設進士科未有入翰林者至十八年三月以第一甲丁顯練安黃子澄為修撰後遂為例見黃佐翰林記謹附考

明史卷一百四十三考證